

郊當此之危甚於他所驚魂滯魄長劫難伸須仗玄勳始能解脫今蒙醮主某官等興大慈願發上善心乃就某觀修設無上黃籙大齋供養三清玉虛諸聖位昇仙與度魂相對明善惡之殊途南昌與北府爲鄰示仙凡之異格潔清壇墀整肅方隅延降高真希垂景貺仍敦請南京朝元宮棲雲真人掌行醮事意者薦拔某路無主孤魂洎各家先亡滯魄有親無力附簡提靈伏冀孝子順孫思宗念祖各罄丹誠具瞻真聖香花燈燭藉爲慧照光輝星斗壇場權作彌羅境界俱沾惠澤淹沈枯朽俱獲重蘇高蹈慈航鬱結幽明皆承濟度親踈慶賴宗祖超昇上願皇圖永固聖德惟新邊鄙休兵士民樂業十方三界六道四生

道藏輯要

雲山集

卷

又昂集六

有識無情俱蒙道廕今此玄壇潔備法事巖行畧序片言紀之於石

京兆普度碑

己未冬十月西涼府太子下官八合宿有素願修建無上黃籙醮事卽本府迎祥觀自春抵秋葺營殿堂封治壇墀不遠敦請棲雲真人作大濟度師主張法席越某日召集羽流布陳儀象發文預告三界明真上下神祇齋戒精思庇物葳事望前三日肇行典禮恭祀列聖三百六十分位意者薦濟宗族遠亡近化洎率土無主孤魂兼有親之祀之家投壇附薦自此及彼無戚無疎俱賴薰修普祈超度如是行道三日兩夜望後一日昧爽

散壇乃畢盡誠竭力亦仁孝之用心也嘗試言之天地一氣物我同根方萬化之弛張布眾形而區別雜以五行之生尅均以四序之推遷其變日新化亦罔極此氣動用之常也而又一受其形執以爲我有於是相與摩刃對待則有強弱廢興死而後已殊不知氣之所役時之所運數之所存理之所在一債一起有始有終得失存亡天之所造孰能禦之爲之者敗執之者失逆之者滅順之者昌角智者窮角力者負蓋人之不可勝天久矣方今皇朝應運奄有諸夏朔南漢北東海西涼異軌殊途咸歸一統天下無二道率土無兩心向之兵革屠裂備經之矣彼之宗祀覆絕俱見之矣以今較昔萬無一存以已方人身獲安

道藏輯要

雲山集

卷

又鼎集六

吉枝葉滋蔓有人爵之從納白天之祐以身之幸思天下之不幸以己之親念天下之無親合氣同根得無感慨是以允懷素願披露丹衷仗玄元救物之慈啓黃籙大齋之法仰眾真之曾力翼三境之垂光照燭幽冥開通陰府收攝萬氣久沈之魄悉歸源混合百神無主之魂皆拔萃共乘和氣幽贊皇圖一混車書載橐弓矢多方順化四海歸仁亦臣子之至願也醮筵潔備法事嚴行刻石紀功庶傳不朽撫實而直書其銘曰

夫物芸芸 各復其根 往而不返 無主之魂

執守之魄 不得其門 依草附木 莫知所存

况在兵塵 連年不息 殄殲勦絕 萬不存一

驚魂失措 轉徙沉溺 隨化往來 動經劫石  
今承醮主 發上善心 崇修黃籙 拔擢幽沈  
普天率土 往古來今 無疎無戚 俱賴威音  
虛魄以歸 遊魂復本 介見者潛 豕立者泯  
何彼何此 咸居範圍 冲氣冥會 承平庶幾

黃籙大齋碑

人生天地間如蘧廬逆旅之暫寄距以百年光景之速猶白駒之過隙忽然而已未有常而不化者也而人在數十年中或壽或夭形有定數各不自知朝夕如是求其出化機之表入太漠之鄉者幾人哉自是而下孰能勉之夫爲子者乃父母之委蛻

道藏輯要

雲山集

齋

又昂集六

也生死之間將何以報是以生當愛敬死當哀戚禋祀不忘禮之常也載思其親向之在世爲身爲我及諸萬慶誘引七情六欲之所謾昧無時不妄無時不爲過積邱山善無絲忽今也骨骸委地魂魄投空滅而不續則若存而不滅果安在哉其在此乎在彼乎墮冥府之考校乎遊天上之宮闕乎其出入於六道四生乎其復生於人世乎噫未可知也有居無事而推之者矣若有真宰所司以幽明之異趣味然罔識冥冥悠悠而已可不  
大哀耶是以孝心不忘思親報本其恩罔極泣血傷心匪仗玄勳憑何薦拔固當竭誠致敬披露丹衷祈禱高真希垂開度幸冀靈魂超越苦趣不逢亦感通之理也茲辰某人奉薦亡父母